

1 JUAN

Jesucristo ded pah ã jummat

¹ Ded pah Jesucristo ã jummatjidih yeebdíh wã naóh daácna caá. Jesucristo biíhmah jumni,* ded pah Dios ã jummatdih naóhni, cáacwã Diosjeéh páantjeh jummat túut-nibut át jumup wut jĩ. Dios cáacwãdih ded pah ã naáwát-dih Jesúsboó naóh yapani ã jumup jĩ. ã naáwáchah joinít, jwiítjeh caandíh jwĩ enep jĩ. Jwiítidih ã duó wáyachah, caandíh jwĩ pej jumup jĩ. ² Jesucristo cáacwãdih páantjeh jummat túutni, nin baácboó ã jũúwát pínah játih ã íp Diosjeéh jumniiji nin baácboó át cáac jumup tajĩ. Caandíh ennitji buu áih doonádih yeebdíh wã naóhna caá.* ³ Jwĩ íp Diosjeéh, ã wũúh Jesucristojeéhbut jwĩ túi jumna caá. Pánihna, yeéb jwĩjeéh, jwĩ ípjeéh, ã wũúhjeéhbut ñi túi jummat pínah niijná, jwĩ ennijidih, jwĩ joiníjidihbut yeebdíh wã naóhna caá. ⁴ Bícdih wēinit jwĩ jummat pínah niijná, nindih yeebdíh wã daácna caá.

Baabát panhipboó jwĩ jummat

⁵ Dios wũúh jwiítidih ã naóhniiji bohéatdih buu yeebdíh wã naóhna caá. Dios túini yoobát jumna, baabát panihni caá. Dedé yéejat wihcah, dupúát caandíh ã wihcan caá. ⁶ Jwiít yeejép chājnit, dupúát panhipboó jumna yuhna, “Diosjeéh wã túi jumna caá”, niijnít, yeena caá jwĩ chājap. Dios ã náahat pah jwĩ chājcan caá. ⁷ Obohjeéhtih, túi chājnit, baabát panhipboó Dios ã jummat pah muntih jwiítbut jumna, ájeéh jwĩ túi jumna caá. Áihwajeéhbut jwĩ túi jumna caá. Caandíh jwĩ jepahat jíib, Dios ã enechah,

* 1:1 Jn 1.1,4; 6.68; 1Jn 2.13-14

* 1:2 Jn 1.14,18

ã wũh Jesucristo cruzboó wun wũhnit, áih meépjh jwiít dih yéejat wihcannit pah ã chãjna caá.

⁸ “Weém bácah yéej chãjni nihcan caá”, niíj jenah joinít, yeeatdihjeh jwĩ jenah joiná caá. Páant niíj jenah joiná, Dios naáwát dih jwĩ túi jenah joicán caá. ⁹ Obohjeéhtih, jwĩ yéej chãjatdih Diosdih jwĩ naáwáchah, caandíh ã quíib bũdbípna caá. “Dios yoobópdih jumni ã niiját pah ã chãjbipna caá”, jwĩ niíj jéihna caá. ¹⁰ “Weém yéej chãjni nihcan caá”, niíj jenah joiná, “Dios yeeni caá”, niijnít, ã naáwát dih jwĩ náahcan caá.*

2

Jesucristo jwiít dih ded pah ã teo wáacat

¹ Wã weh panihnitá, yeéb yeejép ñi chãjcat pínah niijná, nindih yeebdíh wã daác wahna caá.* Obohjeéhtih, jwĩ yéej chãjachah, Jesucristo, yéejat wihcanni, ã ípdih jwiít dih ã naóh teo wáacbipna caá. ² Jwiít yéejnit jwĩ jumuchah, jwĩ yéejat Diosdih ã jãhna caá. Dios bíicdih jwĩ túi jummat pínah niijná, Jesucristo jwiít dih ã wun wũhup jĩ.* Jwiít dihjeh nihcan, nihát baácdih moón jwĩ yéejatdih yohat túut niijná, ã wun wũhup jĩ.

³ Dios ã wutat pah chãjna, “Ájeéh wã túi jumna caá”, jwĩ niíj jéihna caá.* ⁴ Obohjeéhtih, bita “Diosjeéh wã túi jumna caá”, niijná yahna, ã wutat pah chãjcan, yeenit caá. Pánih yeenit, Dios naáwát dih í jéihcan caá. ⁵ Obohjeéhtih, bíihboó ã wutat pah chãjni Diosdih ã túi oina caá. Diosjeéh jwĩ túi jummatdih nin pah jwĩ jéihbipna caá: ⁶ Ded Diosjeéh túi jumni Jesucristo ã chãjatji pah muntih caanbút ã túi chãjbipna caá.

Jáap wutat

* 1:10 Pr 20.9 * 2:1 Ro 6.11-14 * 2:2 1Jn 4.10 * 2:3 Jn 14.15,21,23

⁷ Wã oinitá, yeebdíh bũũ wã daácni jáap wutat nihcan caá. Jon játih ñi jéihni wutatjeh tigaá. Yeebdíh Jesúíh doonádih jwĩ naáwáchah, nin wutatdihbut ñi joyóp jĩ.*

⁸ Obohjeéhtih, máa wutat yuhna, jáap wutatbut ã jumna caá.* Cristo nin wutatdih jepahnit, jwiít cáacwādhbut ã oyat túutup jĩ. Dupúát panhipboó ñi jumuchah, Cristo nin baácna jũóhñit, caán dupúátdih ã baabánap jĩ. Pánihna, ã baabáát panhipboó jumnit, Cristo ã oyat túutadih ñi jepahna caá.

⁹ “Weém baabápboó jumni Dios ã wutatdih jepahni caá”, niijná yuhna, ã dée panihni Jesúíhdih eníhcan, Dios ã wutatdih jepahcan, dupúnapboó jumni caá. ¹⁰ Ded ã dée panihnidih oini baabápboó ã jumna caá. Pánih oina, caandíh dedé bũgát panihni ã wihcan caá.* ¹¹ Obohjeéhtih, ded ã dée panihnidih eníhcan, dupúnapboó ã bejna caá. Pánih bejna, jéih encanni panihni ded pah ã chājatdih ã jéihcan caá.

Cristodih túi jenah joyát ded pah ã jummat

¹² Wébítá, Cristo ã wun wūhatjĩh ñi yéej chājatdih át yohop taga. Pánih yéejat yohñit ñi jumuchah, yeebdíh wã naóh daácna caá. ¹³ Behnitá, yeéb bííhmahjeh jumni Cristodih ñi túi jéihna caá. Caandíh túi jéihnit ñi jumuchah, yeebdíh wã naóh daácna caá. Japatá, yeéb nemépwā ĩ maáhdih ñit yap yohop taga. Pánih yap yohñit ñi jumuchah, yeebdíh wã naóh daácna caá.

¹⁴ Wébítá, jwĩ ípdih ñi túi jéihna caá. Caandíh túi jéihnit ñi jumuchah, yeebdíh wã naóh daácna caá. Behnitá, bííhmahjeh jumni Cristodih ñi túi jéihna caá. Caandíh túi jéihnit ñi jumuchah, yeebdíh wã naóh daácna caá. Japatá, Dios naáwátdih túi jepahnit, wēp ñuhñit panihnit

* 2:7 2Jn 5-6 * 2:8 Jn 13.34; 15.12 * 2:10 Ro 13.12-14

ñi jumna caá. Pánih jumnit, nemépwã ï maáhdih ñit yap yohop taga. Páant ñi jumuchah, yeebdíh wã naóh daácna caá.

¹⁵ Diosdih jéihcannit ded pah ï en ñinahatdih ñi en ñinahca bojoó. Ded queét panihni jwí ípdih ã oican caá.* ¹⁶ Diosdih jéihcannit nin pah ï jumna caá: Yeejép chájatdih ï en ñinahna caá. Bíí déedih wëi ennit, ï bíbohíh jenah joiná caá. Dawá bíí déedih bíbohna, “Weém bita chah túini wã jumna caá”, ï níj jenah joiná caá. Jwí ípboó páant ã jenah joyát túutcan caá. ¹⁷ Nin baác ã buudúchah, ded pah cáacwã yeejép ï náah jenah joyátbut ã buudbípna caá. Obohjeéhtih, Dios ã náahat pah chájnitboó páantjeh ájeéh ï jumbipna caá.

Yoobópdih naáwát, yee naáwát

¹⁸ Wehá, nin yeó jáapna buudát pínah toáh jüöhna caá ã chájap. “Cristodih tubit en jüihni ã jumbipna caá”, ï níjíchah, ñiát joiná jí. Pánihna, buu dawá ï jüúwátidih jéihnit, “Péeni yeó jáap bahnijeh ã jadhna caá”, jwí níj jéihna caá. ¹⁹ Queét Cristodih en jüihnit jwí cátih jumna yuhna, jwiítidih ï éemp yoh bacap jí. Páant ï bacatdih ennit, Jesúíhwã yoobát ï nihcatdih jwí jéihna caá. Queét áihwã nihna, jwíjeéh ïta chão tágaá. Jwíjeéh páantjeh ï jumuchah nihna, Cristodih en jüihnit ï jummatdih jwíta jéihcan tagaá.

²⁰ Obohjeéhtih, yeebdíh Túini Espíritu ã jumuchah, yeéb nihat Cristoíh dooná yoobópdih ã jummatdih ñi túi jéihna caá.* ²¹ Yeebdíh naóhna, “Queét ï túi jéihcan caá”, wã níj jenah joicán caá. Obohjeéhtih, túi jéihnit ñi jumuchah, yeebdíh wã naóh daácna caá. Caán dooná dedé yeeat ã wihcatdih ñi túi jéihna caá. ²² Nin pah caá yeeni ã níjíp: “Jesús Dios ã wahni nihcan caá”, ã níjíná caá. Ded

* 2:15 Stg 1.27

* 2:20 1Co 2.10-16

“Jesús Dios wũúh nihcan caá”, niij naóhni Jesucristodih, jwĩ íp Diosdihbüt en jũihni caá. ²³ “Dios wũúh Jesús nihcan caá”, niijní jwĩ íp Diosjeéh ã túi jumcan caá. Obohjeéhtih, “Jesús Dios wũúh caá”, niijníboó jwĩ ípjeéh ã túi jumna caá.

²⁴ Yeéb Jesúsdi jwíih jepahnit, ded pah ã jummat doonádih ñi joyóp jĩ. Páant ñi joyátjidih ñi túi náhninaá. Pánih náhninit, Jesúsdi, ã ípdihbüt ñi túi pej jumtipna caá. ²⁵ Nin pah Jesús jwiít áihwādih ã niij naáwáp jĩ: “Yeéb wajeéh páantjeh ñi túi jumtipna caá”, ã niijíp jĩ.

²⁶ Yeebdíh yeenitdih ñi joyáh bojat pínah niijná, wã naóh daácna caá. ²⁷ Jesucristo yeebdíh Túini Espíritudih át wũhup taga. Ñijeéh jumnit, yeebdíh ã túi bohéna caá. Yoobópdi bohéna, yeeatdih ã naóhcan caá. Páant ã bohénachah, biíh bohénidih ñi náahcan caá. Pánihna, ã bohéatdih joí cádahcan, Cristojeéh páantjeh ñi túi jumúú.

²⁸ Páant tigaá, wehá, Cristojeéh páantjeh ñi túi jumúú. Pánih jumnit, ã jwũub dei jũúwúchah, úumcan, ñi tíccan niít. ²⁹ Jesucristo túini ã jummatdih yeéb ñi jéihna caá. Pánih jéihnit, nihat túi chäjnit Dios weh í jummatdihbüt ñi jéihna caá.

3

Dios weh jwĩ jummat

¹ Jwiítidih bainí oican, “Yeébboó wã weh caá”, Dios ã niijná caá. Ñ oinit jumna, jwiít ã weh caá. Pánihna, yéej chäjnitboó Diosdih jéihcan, jwiít ã wehdihbüt í jéihcan caá.* ² Wã oinitá, buu Dios weh jwĩ jumna caá. Obohjeéhtih, ded pah jwĩ jummat pínahdih jwĩ túi jéih jwũhcan caá. Jesucristo ã jígohochah, caandíh ennit, ded pah ã jummatdih jwĩ túi jéihbipna caá. Pánih jéihnit, caán ã jummat pah muntih, jwiítbüt jwĩ jummat pínahdih jwĩ jéihna caá.

* 3:1 Jn 1.12

³ Det Jesucristo ã jwáub dei jüwát pínahdih páinitboó yéej chāj cádahnit, ã túi chājat pah muntih ĩ túut nuumná caá.

⁴ Nihat yéej chājnit Dios ã wutatdih yap yohnit caá. Dedé yéej chājat Dios ã wutatdih yap yohat ã jumna caá. ⁵ Cáacwã ĩ yéej chājatdih yohni pínah Cristo ã cáac jummatdih ñi jéihna caá. Caánboodih yéejat wihcan caá.*

⁶ Ded Cristo bícdih jumni páantjeh ã yéej chājca bojo naáh. Obohjeéhtih, ded yéej chāj cádahcan, Cristodih jéihcan, áih nihcan caá. ⁷ Wã oinitá, yeebdih yeenitdih ñi joyáh bojó. Nihat túi chājnit Jesucristo yoobópdih ã jummat pah muntih, queébtut yoobópdih ĩ jumna caá. ⁸ Obohjeéhtih, yéej chājniboó nemépwã ĩ maáih ã jumna caá. Nemépwã ĩ maáh bácah, biíhmahjeh yeejép chājni caá. Páant ã chājatdih yoh beedáni pínah Dios wūúh nin baácboó át cáac jumup tajĩ.*

⁹ Det Dios weh jumna, jwĩ íip Dios ã jenah joyát pah queétdihbut át jenah joyát túutup taga. Pánih jenah joinít, ã wēpat ĩjeéh ã jumuchah, páantjeh ĩ yéej chājcan níit. ¹⁰ Nin pah Dios weh, nemépwã ĩ maáh wehbut ĩ jummatdih ñi jéihbipna caá: Túi chājcannit, ĩ déewādh oicannit Dios weh nihcan caá. Nemépwã ĩ maáh weh ĩ jumna caá.

Jesúhwã ĩ míic oyat

¹¹ Yeéb Jesucristodih jwíih jepahnit, “Míic oyat caá náahap”, jwĩ níj bohéatdih ñi joyóp jĩ.* ¹² Caín ã jummatji pah ñi jumca bojó. Caán nemépwã ĩ maáih jumna, ã úddih át mao yohop wut jĩ. ¿Dépanih tigaá ã úddih át mao yohji? ñi jenah joyóchah. Caandih yeebdih wã

* 3:5 Jn 1.29 * 3:8 He 2.14-15 * 3:11 Jn 13.34; 15.12

naóhbpna caá. Caín yéej chājni jumna, ã údboó táí chājni ã jumatdih íjnit, caandíh át mao yohop wut jī.*

¹³ Páant tigaá yéej chājnitboó yeebdíh í eníhcan caá. Pánihna, í en jūihñuchah, “¿Dépanih tigaá weemdíh í en jūih?” ñi níj jenah joicá bojóó. ¹⁴ Yeejép chājnit, iiguípna bejnit pínah jwí jumap yuh jī. Obohjeéhtih, buu jeáboó bejnit pínah jumna, túiniboodíh túut nuumná caá jwí chājap. Jesúihwādih oina, jwiít dih ã túut nuumát dih jwí jéihna caá. Ded cáacwādih oicanni iiguípna bejni pínah ã jumna caá.* ¹⁵ Ded ã déedih eníhcan, mao yohíhat jenah joyát caá caandíh ã jumap. Pánih jumna, Dios ã enechah, cáacdih mao yohni bíic yoobó ã jumna caá. “Ded mao yohni Diosjeéh páantjeh ã jumcan níít”, ñi níj jéihna caá. ¹⁶ Ded pah oyat ã jumatdih nin pah jwí jéihna caá: Jwiít dih búdí oina, Diosjeéh páantjeh jwí jumat pínah niijná, Jesucristo jwiít dih ã wun wūhup jī. Páant ã wun wūhatdih náhninit, “Caán oyat yoobát caá”, jwí níj jéihna caá. Pánihna, jwiítbut wunna yuhna, jwí déewādih táí oinit, teo wáacat caá náahap.* ¹⁷ Dawá bíí dée bíbohni, ã dée panihni moh yéejnidih enna yuhna, caandíh jígah en teo wáaccan, Diosdih ã oican caá. ¹⁸ Pánihna, wā weh panihnítá, “Bitadih wā oina caá”, niijná, jacjeh pohba niijcát caá náahap.

Úumcanjeh, Diosjeéh jwí jumat

¹⁹ Cáacwādih táí oina, Dioíhwā jwí jumatdih jwí jéihna caá. Pánihna, ã peéh chājat pínahdih úumcanjeh, ájeéh jwí táí jumna caá. ²⁰ “Yéejat jíib weemdíh ã jumna nacaá”, jwí níj jenah joyóchah yuhna, Dios nihatdih jéihni jumna, jwí jenah joyát dihbut ã táí jéihna caá. Pánih jéihna, áihwā jwí jumatdih jwí táí jenah joyát pínah niijná, jwiít dih

* 3:12 Gn 4.8 * 3:14 Jn 5.24 * 3:16 Jn 15.13

ã teo wáacbipna caá. ²¹ Wã oinitá, “Dios wã yéejatdih át yoh tagaá”, niíj jengah joinít, úumcanjeh, Diosjeéh jwī túi jumna caá. ²² Pánih jumnit, Dios ã wutatdih jepahna, ã weñat pínahdih jwī chājachah, caandíh dedé jwī wúbátidih jwiítidih ã wūhbiipna caá. ²³ Nin pah jwiítidih ã wutna caá: “Wã wūh Jesucristodih túi jengah joinít, bita áihwāidihbut ñi oyoó”, át niijíp wut jī.* ²⁴ Dios ã wutatdih túi jepahnitboó ájeéh ī túi jumna caá. Dios tjeéhbut ã túi jumna caá. “¿Dios wājeéh ã jum niít?” jwī niíj jéihíhichah, Dios jwiítidih ã wūhni Túini Espíritu “Jújuh, Dios majeéh ã jumna caá”, ã niíj jéihyana caá.

4

Cristodih eníhcannitdih ded pah jwī jéihyat

¹ Wã oinitá, “Túini Espíritu weemdíh nin pah ã niíj naáwát túutna caá”, niíj yeenit, dawá ī jumna caá. Pánihna, Dios ã naáwát túutni ã jummatdih jéihyat túut niijná, ded pah ã naáwátidih ñi túi joyoó. Dios naáwát biíc yoobó ã naóhcah, ñi joyáh bojoó. ² Yoobópdih Túini Espíritu ã naáwát túutni nin pah ã niíj naóhbiipna caá: “Jesucristo jwiít panihni cáac jumna yuhna, Diosjeh át jumup wut jī”, ã niijbípna caá. Páant niijní Dios ã wahní ã jumna caá. ³ Obohjeéhtih, nemépwā ī maáh ã wahniboó, “Jesús Dios nihcan caá”, ã niijbípna caá. Páant niijní Dios ã wahní nihcan, Cristodih en jūihniíh caá. Cristodih en jūihniíhwā dawá ī jummat pínah doonádih ñitát joi tágaá. Bū nin baácboó dawá ī jumna caá.*

⁴ Obohjeéhtih, yeébboó, wã oinitá, Dioíhwā ñi jumuchah, Túini Espíritu ñijeéh ã jumna caá. Jesúsdih jepahcannit, nemépwā ī maáh ã wēpat chah, Túini Espírituboó ã wēpna caá. Pánihna, yeebdíh ī yee

* 3:23 Jn 13.34; 15.12,17 * 4:3 Mt 7.15; 2Jn 7

naawáchah yuhna, caán ã wēpatjīh queétdih yap yohnit ñi jumna caá. ⁵ Queétkoó Dioíhwā nihcah, ĩ bohéatbut Dioíh nihcan caá. Bitá Dioíh nihcannit, ĩ bohéatdih ĩ túi wēi joiná caá.* ⁶ Obohjeéhtih, Dioíhwā jumna, ã naawáttdih jwī bohénachah, áihwāboó jwiíttdih ĩ túi wēi joiná caá. Diosdih jéihcannitboó, jwī naawáchah, ĩ joíhcan caá. Pánihna, Dios naawáttdih ded yoobópdih bohéni, ded yee bohéni ã jummatdih ñi jéihbipna caá.*

Dios oini caá

⁷ Wā oinitá, oyat wēpat Dios jwiíttdih ã wūhuchah, bitá áihwātdih jwī oi jīfh. Det bitadit túi oinit Dios weh ĩ jumna caá. Pánih jumnitjeh Diosdih jéihnit, ájeéh ĩ túi jumna caá. ⁸ Dios oini ã jumuchah, bitadit oicannit, Diosdih jéihcan, ájeéh ĩ jumcan caá. ⁹ Dios ã wūh biíc jumnidit nin baácboó át wah deyanap tajī, ã wēpatjīh Diosjeéh wēinit, páantjeh jwī jummat pínah niijná. Pánih chājna, ded pah ã oyatdih jwiíttdih át jéihyanap tajī.* ¹⁰ Oyat yoobát nin pah caá ã jumap: Diosdih jwī oyat pah nihcan, jwiíttdih Diosboó ã oyat pah caá oyat yoobát ã jumap. Jwiíttdih búdí oinit, jwī yéejat jíib iiguípna bejat déejidit túi ubat túut niijná, Dios ã wūhhdit át wun wūhat túutur wut jī.

¹¹ Wā oinitá, Dios jwiíttdih caan páh búdí ã oyochah, jwiíttdit túi míic oyat caá náahap. ¹² Nihat Diosdih encannit jwī jumna caá. Obohjeéhtih, jwī míic oyochah, Diosjeh jwījeéh ã jumna caá. Páant ã jumuchah, ã náah yacat pah ã oyatjīh bitadit jwī túi teo wáacna caá.* ¹³ Dios jwiíttdih áih Túini Espíritudih át wūhup taga. Páant jwījeéh ã jumuchah, “Dios bíicdih wā jumna caá. Wájeéh caanbát ã jumna caá”, jwī níj jéihna caá.* ¹⁴ Jwī íp ã wūhhdit

* 4:5 Jn 15.19 * 4:6 Jn 8.47 * 4:9 Jn 3.16 * 4:12 Jn 1.18 * 4:13 Ro 8.9; 1Jn 3.24

nin baácboó ãt cáac jummat túutur tajĩ, cáacwãdih ã túi ubat pínah niijná. Páant ã cáac jummat túutnijidih jwiítjeh jwĩ enep jĩ. Pánih ennitji, bitadih jwĩ jéih naóhna caá.*
 15 “Jesús Dios wũúh caá”, niijníjeh Diosjeéh ã túi jumna caá. Diosbut ãjeéh ã túi jumna caá.

16 Dios jwiítidih ã oyatdih jwĩ jéihna caá. Pánih jéihnit, caandih jwĩ túi jenah joiná caá. Dios nihat cáacwãdih búdí ã oina caá. Pánihna, ded bitadih oini Dios biícđih ã jumna caá. Diosbut ãjeéh ã jumna caá. 17 Pánih Dios biícđih jumna, caandih, bitadihbut jwĩ túi oina caá. Pánih oina, cáacwã ã yéejat jíib peéh chãjat yeó jáapđih úumcanjeh, jwĩ túi jumnipna caá. Cristo ã íp Dios biícđih ã jumuchah, jwiítbut nin baácboó jum jwuhna, biíc yoobó caán biícđih jwĩ jumna caá. Pánih jumnit, ã jwúub dei jũúwáchah, jwĩ úumcan níft. 18 Ded Diosdih oini ã oyatdihbut jéihna, caandih ã úumcan níft. Pánih túi oina, jwĩ oinidih jwĩ úumcan caá. Obohjeéhtih, biíhdih úumna, caán ã peéh chãjat pínahdih jwĩ úum jenah joiná caá. Pánihna, jwĩ úumnidih jwĩ oican caá.

19 Dios jwiítidih ã oi waáwáchah, jwiítbut caandih, bitadihbut jwĩ jéih oina caá. 20 Ded ã dée panihnidih eníhcan, “Weém Diosdih wã oina caá”, niijná yuhna, ã yeena caá. Biíhdih enna yuhna, ã oican, Dios ã enca naáhdih ã jéih oican caá. 21 Pánihna, nin pah jwiítidih Jesucristo ã niij wutur jĩ: **“Ded Diosdih oina, ã dée panihnidihbut oyat caá náahap”, ã niijíp jĩ.***

5

Dios weh yéejatdih ã yap yohat

* 4:14 Jn 3.17 * 4:21 Mt 5.44-45; Mr 12.29-31

¹ Det Jesúsdiŋ “Dios ã wahni Cristo caá”, niijnít, Dios weh ï jumna caá. Det jwĩ íp Diosdiŋ túi oinit, ã wehdihbüt ï oina caá. ² Diosdiŋ oina, ã wutatdiŋ jepahnit, ã wehdihbüt jwĩ oyat yoobópdih ã jumatdiŋ jwĩ jéihna caá. ³ ã wutatdiŋ jepahnajeh, Diosdiŋ jwĩ túi oina caá.* Caandíh oina, jwiítđih ã wutat wái náah jumni nihcan caá.* ⁴ Det Dios weh jumna, yéej chājatdiŋ ï jéih yap yohna caá. Jesucristo ã wēpatdiŋ túi jenah joiná, Diosdiŋ jéihcannit ï jenah joyát pah, jwĩ jenah joicán niít. ⁵ “Jesús Dios wũúh caá”, niij jenah joiníjeh yéejatdiŋ náahcan, ã yap yohna caá.

Dios wũúh ded pah ã jumat

⁶ Jesucristo nin baácboó át cáac jumup tají. ã tewat pínah játih, Juan Daabánidih ã daabáát túutur jĩ. Túttimah, cruzboó wun wũhna, áih meépdih ã yohop jĩ. Pánihna, mahjĩh ã daabáátđih, cruzboó áih meép ã yohatdiŋbüt náhninit, Dios wũúh ã jumatdiŋ jwĩ jéihna caá. Túini Espíritubüt “Nin Dios wũúh tigaá”, jwiítđih ã niij jéihyana caá. Caán Túini Espiritu yeecan, yoobópdih naóhni caá. ⁷⁻⁸ Pánihna, Jesús Dios wũúh ã jumatdiŋ nit biíc peihcannit jéihyanit ï jumna caá: Túini Espiritu jwiítđih ã jéihyanachah, mahjĩh ã daabáátjidiŋ, áih meép ã yohatjidiŋbüt jenah joinít, Jesús Dios wũúh ã jumatdiŋ jwĩ jéihna caá. ⁹ Cáacwājeh ï naáwáchah joiná, “Caán yoobópdih tigaá”, jwĩ niijná caá. Páant niijnítđih jwĩ joiná yahna, jwĩ íp ã wũúhđih naóhna, cáacwā ï naáwát chah ã jumuchah, caánboodíh túi joyát caá náahap.* ¹⁰ Dios wũúhđih ded túi jenah joiní “Jesús Dios wũúh ã jumat dooná yoobópdih tigaá”, ã niij jéihna caá. Obohjeéhtih,

* 5:3 Jn 14.15; 2Jn 6

* 5:3 Dt 30.11; Mt 11.30

* 5:9 Jn 5.32-37; 8.18

Dios ded pah ã wũúhdih ã naáwátdih joyáh bojni “Dios yeeni caá”, ã niijná caá. ¹¹ Nin pah Dios jwiít dih ã niíj jéihyana caá: “Wã wũúhdih túi jenah joinít, páantjeh wãjeéh ñi jumbipna caá”, ã niijíp jĩ. ¹² Dios wũúh Jesúsdih ded túi jenah joiní, Diosjeéh páantjeh ã jumna caá. Obohjeéhtih, ded Jesúsdih jepahcanni, Diosjeéh ã jumcan niít.*

Juan ã pée naáwát

¹³ Yeéb Dios wũúhdih túi jenah joinít dih naóh daácna caá wã chãjap, páantjeh Diosjeéh ñi jummat pínahdih ñi jéihyat pínah niijná.*

¹⁴ Dios ã náahat pah caandíh jwĩ úúbúchah, jwiít dih ã joyátdih jwĩ túi jéihna caá. Pánih jéihna, úumcanjeh caandíh jwĩ úúbhna caá. ¹⁵ Páant ã joyátdih jéihna, “Wã úúbátdih át wũh tagaá”, jwĩ niíj jéihna caá.*

¹⁶⁻¹⁷ Yeéb ñi dée panihni ã yéej chãjachah ennit, Diosdih ñi úúbú, ã yéejat jíib caandíh iiguípna ã wahcat pínah niijná. Páant ñi úúbúchah, Dios caandíh ã túut nuumbipna caá, ãjeéh páantjeh ã jummat pínah niijná. Obohjeéhtih, ded Cristodih páantjeh náahcan, yap yohnit, áihwādhbut eníhcan, iiguípna ã bejbipna caá. Pánih niboodíh ñi úúbát pínahdih wã wutcan caá. Nihat yéej chãjat Diosdih yap yohat míic caá. Obohjeéhtih, biíh yéej chãjat iiguípna ã bejat túutcan caá. Pánih chãjnit dih caá úúbát náahap, ï túut nuumát pínah niijná.

¹⁸ Dios wũúh Jesús áihwādh ã túi en daoná caá, nemépwã ï maáh queétdih ã yéejacat pínah niijná. Pánihna, “Dios weh páantjeh ï yéej chãjcan caá”, jwĩ niíj jéihna caá. ¹⁹ “Jwiítboó Dioíhwã jwĩ jumna caá. Obohjeéhtih, nihat Diosdih náahcannit dih Satanás caá ã wutap”, jwĩ niíj jéihna caá. ²⁰ “Dios wũúh nin baácboó cáac jumnit, Dios

* 5:12 Jn 3.36 * 5:13 Jn 20.31 * 5:15 Mt 7.7-11; Lc 11.9-13; Jn 15.7,16; 16.23-24; 1Jn 3.21-22

yoobátdih jwĩ jéihyat pínah niijná, jwiítdih ã jéihyanap jĩ”, jwĩ niíj jéihna caá. Pánihna, Diosjeéh tái jumnit, ã wũúh Jesucristojeéhbut jwĩ tái jumna caá. Jesucristo Dios yoobát jumna, páantjeh Diosjeéh jwiítdih ã tái jummat tútna caá.* ²¹ Wã weh panihnitá, jĩi tái chãja chaáh! Pãpnidih ñi wēi uúbhca bojoó.

Páant bóojeh tigaá wã naáwát.
Juan

* 5:20 Jn 17.3

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
